

Als dunt ouch die / den jr boßheyt
Gott lang vffbesserung vertreit
Vnd sie doch täglich mer vnd mer
Vffladen / dar durch gott der herr
Jr warttet / byß das stundlin kunt
So bzalen sie bym mynnsten pfundt
Es starben frowen / vieh / vnd kyndt
Do der von Amorreen sünd
Vnd Sodomiten kam jr ziel /
Hierusalem zu boden fiel
So jm gott beittet lange jor
Die Ninuiten bzaltten vor
Gar bald jr schuld / vnd wurden quit
Doch bhartten sie die lenge nit
Sie nomen vff noch grösser we
Des schickt in gott keyn Jonas me /
All ding die hant jr zyt vnd zyl
Vnd gant jr stroß noch / wie gott wil /
Wem wol ist mit nēmen vff borg
Der hat zu bzalen gantz keyn sorg /
Nit biß by den / die bald jr hendt
Strecken / vnd für dich bürgen wendt
Dann so man nit zu bzalen hett
Sie nement kuter von dem bett /
Do hunger in Egypten was
Nomen sie korn vff so vil / das
Sie eygen wurden hyndennoch
Vnd müsten das bezalen doch /
Wann der esel anfoht syn dantz
Haltt man in nit wol by dem schwantz

e

